

Joxe Agustin Arrieta Egiguren

Apaiza

# Mozorroto?

■ Inauterietan gaude. Festazale gara. Gogoko ditugu algarak eta saltoak, farrak eta jaiak. Ederra da, beste era batera, *kaixo lagun* esatea, eta jendea, bere arazoak ahaztuta, irribarrez ikustea. Gogoko dut elkarrekin egotea, asko zatea, festak elkarrekin gozatzeko baitira... baina nortasuna eta izakera mozorroto gabe. Mozorroto: bai ala ez? Zeuk ikusi...

Gizakiok, keinu eta hitzen bitartez elkarri geure berri ematen diogu, keinu eta hitz horien bidez ezaguterazten dizkiegu besteek gure asmoak, gure sentipenak, gure gogorapenak. Gure keinuak eta gure hitzak egiazkoak dira, geure pentsakera eta sentikera argi eta garbi, gezurrik gabe, adierazten dituztenean.

Norbait egiazale denean, merezi du konfidantza, eta sinesten zaio sinesgarrien eta ziurgarrien beharrik gabe. Egiazaleak, gainera, egia azaltzen du, horrek zailtasunak sortzen badizkio ere.

Egiazaletasunak pertsonen arteko harremanetan konfidantza sorrerazten du. Beti du bakoitzak eskubide besteengandik egiazaletasuna itxaroteko. Egiazaletasuna lagun hurkoa maitatzeko era bat da.

Egia maitatzeak besteen iritziak errespetatzera eramaten gaitu, eta haietan dagoen egia-zen zatia bilatzen saiatzera; izan ere, bakoitzak berekin egia-zen zati bat izan ohi du. Gizakien artean elkarriketa da bidea, denen artean egia bilatzeko eta haren zerbitzari izateko.

Zail zaio besteek entzuten ez dienari egia aurkitzera iristea eta, aurkitzen badu ere, ia ezinezkoa gertatzen zaio egia hori besteek zabaltzea.

Gure hitzen egiazkotasunak hitz horiekin leial izatera eramaten gaitu, gure hitza betez. Horrela, egiazaletasuna ez da hitzen kontua bakarrik, bizikera eta jokaera kontua ere bada.

Egiazaletasunean oinarritzen diren konfidantzazko harremanek bakoitzaren barnetasunarekiko errespetoa eskatzen dute, eta jakin ahal izan ditugun kontu isilak isil gordetzera behartzen gaitu.

Gure bizitza egiazaletasunez bizi dugunean, izan litekeen askatasun mailarik haundiena lortzen dugu; inork kendu ezingo digun askatasun maila.

Gogora ditzadan, behin berriro, elkarrekin anaikiro lan egitera deituak gauden eginkizua

nik garrantzitsuenak: norabide eta itxaropen gehiago izango duen kultura sortzen ahalegintzea; sorkuntzatik hasi eta heriotzararte bizia bere maila guztietan zaintzea; bakea lortzea; pertsona konkretuen duintasuna eta eskubideak zaintzea; herrien eskubideak eta beraien norberatasuna zaintzea eta, aldi berean, herrien arteko egiazko solidaritza izatea; gazteentzat duintasun eta itxaropen gehiagoko etorkizuna sortzea; izadia eta ekologi oreka zaintzea.

Eta egunero ez mozorroto, hartu erabakia baina: nire lagun hurkoa, nire onginahiaren zain dagoena, nire adiskidetasun eta laguntza behar duenaren alde. Nire lagun hurkoa, egunero era berri batean, begiratu bigun batekin, hitz egoki batekin, esku luzatze arretatsu batekin mesede egin diezaiokeen lagun hurkoa, ez dago han, mendien bestaldean, ez, ez da bizi itsasoaren beste muturrean; nire lagun hurkoa hemen dago.

Eta egunero ez mozorroto, hartu erabakia baina: nire lagun hurkoa!, aspalditik ohean dagoen eta ni ikustera joan ez natzaion alde-meneko gaisoa da. Egunkaria irakur diezaiokeen itsua da. Langabezian gelditu delako lur jota dagoen eta inork gogoan ez duen laguna da. Horixe lagun hurkoa.

Eta egunero ez mozorroto, hartu erabakia baina: nire lagun hurkoa!, hau da, nire senarra, nire emaztea, nire etxe barrua da. Hau da, nire bihotz-berotasunaren bila dabilen nire seme-alaba. Nire aita eta nire ama dira, zaharturik dauden eta nire laguntza, nire arreta eta nire haur maitasuna behar dituzten nire gurasoak...

Inauteriak alaikiro ospatu ditzagula. Iturri bat bezala izan behar dugu. Gure bihotzetik ura jaio behar du etengabe; gure ingurukoak alaitasunez eta zorionez betekiko dituen ur bizia. Festaren berriemaile eta zabaltzaile egin zaitez:

- Egin zaitez bakarrik dagoenaren lagun.
- Anima ezazu nekatuta eta aspertuta dagoena.
- Saia zaitez haserre daudenen artean bakeak egiten.
- Pentsa ezazu zer egin daitekeen zure taldea bizkortzeko...
- Ager ezazu zure harridura bidean aurkitzen dituzun gauza eder guztien aurrean. ■

Iñaki Segurola



## Karaoke

K anturako gustua aspaldi galdu zen gure munduan (salbuespenak: Irlanda, Zuberoa... huts eta bakar gelditutako parajeak, bihotzak; gure xorion eta ongizatearen trenan galdutako bazterrak). Kantuaren galera horren seinale patetikoena pleibakaren sorrera izan zela esango nuke; eta ez zegoen batere gaizki: belarri on xamarra behar, eta ritmoaren sena, aho mutua egoki mugitzen asmatzeko. Baina aho mutua itxuratien funtzio hori gaur nabarmenegia zen, gezur jakinegia, eta huts hori erremediatzera etorri da karaokea, karaokearen ugaltze ikaragarri hau. Karaokean ez dago gezurrik, nork bere ahots eta kantaera propioa entzunarazten du, aukeran, libreki, eta horrezaz gainera, *performance*-a biribiltzeko, imintzio ergel batzuk egin litezke, eta txorakeria pixkat, eta dantza lerdo puxkat. Aukeran, libreki, eta izugarri libertituaz gainera. Txotxongiloak diruditela karaokerrak?, edo loritoak, edo papagaioak, edo sunormalak? Bai, egia, dena dago grabatua, dena dago idatzia, letra eta musika. Eta zer? Eta zuek zer uste zenuten zela bizitza izeneko hau? Ba, karaokea asmatu zuen berberak asmatutako gauza bat inondik ere: letra eta musika, dena grabatua, dena idatzia, papagaioaren performantza ekitaldi bakar luze-luzean, baina nork bere ahots eta aurpegiarekin ustez, nork bere imintzio eta txorakeriekin, aukeran, libreki, eta, mirarien mirarial, izugarri libertuaz gainera.

Anjel Lobera



## Uzbekistango alaba

Gizonaren etxera ezkondu zen; gizonak txitean-pitean jotzen zuen; gizonak nahi guratan bortxa egiten zion; gizonak umeak ekarrarazi zizkion; gizonak hil egin zion ekarrarazitako umeetarik bat... eta gogaitu egin zitzaion gure andreari; eta erabaki bat hartu zuen gure uzbekistandar andreak; eta...

...beraren amaginarreba eta aitaginarrebari gonbitea luzatu zien etxera bazkaltzera joateko; eta arroza okelarekin platereratu zien; eta bigarren platera ere eskeini egin zien; eta postre legez... gizonaren burua (lepoa moztuta) opaldu zien... eta amaginarreba bihotzekoak eroan zuen lurretik atera; eta aitaginarreba psikiatrikora eroan zuten; eta...

...halako baten konturatu gara sistema politiko jakin batek ez dituela pertsonak hobeak edo txarragoak egiten.

Izan ere, Espainian gizonak mozkortutakoan jotzen zuelako, gizona bera pozoinez beratu nahi izan duen andrazkoaren kasua ikusi dugu egunok.

Izan ere, sarritan izaki hutsalak askatu nahian ahaztu egiten zaigu hurkoa gure ondoan dagoela. Izan ere, maizegi betetzen zaigu ahoa berba lodiekin, haragizko gizaki meheak zenbaki eta estatistika huts legez hartzen ditugula.

Izan ere, bestela baitakoan bada ere, jainko ahalguztidunak izan uste dugu: Hera, Zeus, Palas Atenea, Marte, Bacco..., edo jainko txikerren seme-alabak.

L A P h I T Z A

